

*** Declaración institucional co gallo da conmemoración do 8 de marzo "Día das mulleres"**

O 8 de marzo, día internacional da muller, reivindica e visibiliza a loita das mulleres polos seus dereitos, participación e recoñecemento, en pés de igualdade cos homes, na sociedade e no seu desenvolvemento íntegro como persoa. Proposta herdeira de feministas como Clara Zetkin que en 1910 impulsaron tal data e que posteriormente foi institucionalizada polas Nacións Unidas en 1975.

O vindeiro 8 de marzo o feminismo galego fará historia novamente, como xa fixo nos anos 2018 e 2019 cunha folga histórica. Baixo o lema "Sen cuidados non hai vida. Mudando o sistema, derrubando o patriarcado" están convocados diversos actos preparatorios, unha manifestación nacional e numerosas convocatorias locais e comarcais para a propia xornada do 8 de marzo.

Con esta campaña, o feminismo galego sitúa os cuidados no centro do debate e as consecuencias para as mulleres galegas do sistema económico, social e político en que vivimos. A invisibilización dos traballos de cuidados, a feminización da pobreza, as violencias machistas ou a falla de liberdade nas identidades sexuais e/ou expresións de xénero son algúns dos síntomas de subordinación social á que se ven sometidas en todas as esferas da vida e fai ineludíbel tomar todos os espazos que tamén lles pertencen: ás rúas, as institucións, os centros de traballo ou estudo, os espazos culturais etc.

Corresponde ás institucións escoitar e recoñecer os debates que o feminismo galego está a colocar na axenda social e comprometer os nosos esforzos en corrixir as desigualdades que permanecen na Galiza de 2020.

Segundo a diagnose de igualdade e plan de acción e políticas de igualdade da Deputación da Coruña aprobada polo pleno da corporación hoxe no noso país temos, malia que é ilegal, unha fenda salarial duns 5.500 euros entre homes e mulleres, isto tamén acontece coas pensións onde as diferenzas son duns 400 euros. Así mesmo, sabemos que os cuidados de maiores e crianzas recaen maioritariamente nas mulleres, quen continúan a ser con moito as que máis horas das súas vidas invisten nestes ámbitos. Na provincia da Coruña, segundo o estudo citado, hai un 45% máis de mulleres que cuidan de menores de 15 anos; hai nalgunhas comarcas da Coruña diferenzas dun 90% de mulleres cuidadoras a respecto dos homes. Isto loxicamente ten consecuencias non só na saúde das mulleres, senón na calidade dos seus emprego, nas súa relacións sociais, na participación cultural e deportiva etc.

É, ademais, un ámbito non suficientemente investigado e estudado mais que é evidente que ten un gran impacto na economía, que sería insostíbel sen esa achega non remunerada. Cómpre lembrar, por exemplo, que o valor xerado

polas actividades no ámbito doméstico representaría o 50,6% do PIB de Galiza segundo a última Conta Satélite publicada no ano 2013 respecto do ano 2010 e con base 2008.

Por todas estas razóns, este 8 de marzo cómpre recoñecer o traballo do feminismo galego e contribuír desde esta institución a combater a precarización de servizos de cuidados ocupados maioritariamente por mulleres, e a dar visibilidade ao que supón no noso sistema económico e social a contribución do traballo invisible dos cuidados como paso necesario para construír unha nova orde social que supere o patriarcado.

Por estes motivos, o Pleno da Corporación

ACORDO

1. Recoñecer e apoiar as convocatorias do feminismo galego autoorganizado que neste 2020 colocan no centro do debate os cuidados e as consecuencias para as mulleres galegas do sistema económico, social e político no que vivimos, que non podería sosterse sen cuidados que se desenvolven en moitas ocasións de forma gratuíta ou a través da precarización de moitas mulleres, comprometéndose a traballar para que os poderes públicos contribúan a superar esta situación.

2. Demandar da Xunta de Galiza o seu compromiso coa realización de estudos periódicos sobre o valor social e económico do traballo do fogar e do cuidado.

3. Reclamar a necesidade de dotar aos concellos dos medios necesarios para levar a cabo as medidas fixadas no Pacto de Estado en materia de violencia de xénero, atención á dependencia e recursos de conciliación
4. Desde a Deputación da Coruña adquirimos o compromiso de desenvolver, en coordinación cos concellos, as áreas estratéxicas 4 e 5, do Plan de Igualdade relativas as nosas competencias e que teñen a ver con melloras no acceso ao mercado de traballo e na promoción do poder colectivo das mulleres.